



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

20 Janeiru 2014

Tribunál sira iha Timor Leste hahu hikas fali sira nia servisu iha teritóriu laran tomak

Iha loron 16 Janeiru 2013, tribunál hotu-hotu iha Timor Leste hahu fila fali sira nia knaar hanesan bain-bain depois passa ferias annual durante fulan ida hahu husi 15 Dezembru 2013 too 15 Janeiru 2014.

Bazeia ba Dekretu Lei Nú. 20/2012 kona-ba suspensaun ba atividade Tribunál no Feiras ne'ebé defini katak kada tinan atividade tribunál suspende husi 15 Dezembru – 15 Janeriu, durante tempu Páskua no hosi 1 to'o 15 Agostu (Art. 1).

Tuir observasaun JSMP nian ba tribunál distritál hotu-hotu hatudu katak iha loron 16 – 17 Janeiru tribunál tolu hanesan Tribunál Distritál Baucau, Suai no Oe-Cusse la hala'o prosesu julgamentu ho razaun laiha oráriu julgamentu. Úniku Tribunál Distritál Dili maka prosesu julgamentu la'o hanesan bain-bain.

“JSMP preukupa ho oráriu julgamentu husi tribunál tolu (3) ne'ebé loron rua laiha oráriu julgamentu. Ne'e fó impaktu ba redusaun número kazu pendente ne'ebé aas kuaze iha tribunál hotu-hotu. JSMP hanoin katak sei loron rua ne'e utiliza efetivu tribunál bele julga maisumenus kazu 8, dehan Diretór Ezekutivu JSMP, Luis de Oliveira Sampaio”.

JSMP fiar katak fulan ida sufsiente ba autór judisiáriu sira hodi rekopera fali sira nia enerjia ne'ebé durante ne'e dedika ona hodi aseguara justisa ba ema hotu. JSMP konsiente katak durante fulan ida ne'e nia laran majistradu balun la goja sira nia direitu ne'e kompletu, tanba autór judisiáriu sira balun tenke responsabiliza atu atende prosesu urjente ruma ne'ebé maneija atraves husi mekanizmu turno iha kada jurisdisaun ida-idak. Signifika katak autór judisiáriu inklui ofisial justisa no funsionáriu balun tenki servisu tuir oráriu turno hodi responde ba ejizensia kazu urjenti balun ne'ebé akontese durante feriadu judisiáriu nia laran. Mesmu nune'e, JSMP enkoraza atu servisu adisional ka estra hirak ne'e, la bele sai justifikasaun ba tribunál la tuir oráriu julgamentu hanesan normal wainhira sira hahu fali servisu.

JSMP hein katak iha semana ida ne'e ba oin tribunál sira tenke hahu fali agenda julgamentu hanesan normal.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPTl